

清理紅本記  
(三)



線  
651.7  
742  
26  
v.3

舊籍



清理紅本記卷三


蒙古奉寬仲嚴

順治年朝鮮國王謝表一件云，朝鮮國王臣李倬言先於順治二年十一月分，陪臣捧米差使員金滢，回自京師，欽蒙皇上特許出送漂海軍人等因，欽此。本年二月初四日，據進賀陪臣李基祚等馳啓，本國人金沙卜等七名，漂到上國地方，皇上另許放回，等因。據此，除仰戴聖朝前後恩典外，臣與一國臣民不勝感激，謹奉表稱謝者。臣倬誠惶誠恐稽首稽首，伏以聖心慈愛，特軫漂泊之窮，睿澤涵濡，續蒙發還之寵，銘鏤曷已。糜粉難酬，伏念臣幸際昌辰，叨守敝服，事大誠切，慮侯度之或愆，字小恩覃，感帝德之廣運，未效涓埃之補，只憚葵藿之忱，頃有駕船之氓，屢遇飄風之患，至明傍燭，愍脫魚腹之藏，微命曲全，輒遂狐首之願，茲蓋伏遇皇帝陛下

四字黃  
綬簽

德臻並育，道躋博施，



舉四海皆歸于仁，本諸惻隱，無一物不獲其所，體乎生成，至今遐圻，遍荷殊渥，臣敢不若星拱北，如水折東，敬佩綸音，將永沐於雨露，恪守封域，庶益勵於屏藩，臣無任望天仰聖，激切屏營之至，謹奉表稱謝以聞。以下闕損原表高麗白紙，堅韌細膩，厚如木版，縱一尺一寸，廣三寸九分，六行書，黃綾面版，小黃綾簽，書表副二字，濃硃印，方三寸一分，滿篆曰  朝 句 希

句延 句固倫 句呢 句王 句呢 句多蠻 句譯為朝鮮國王之印，無漢字，右角硃

批，覽王奏謝知道了，貢物察收，該部知道，十五字，表之年月闕損，考東華錄順治二年冬十月壬午，初四日朝鮮解白米五萬七百八十餘石，六年六月庚子，十二日朝鮮國王妃趙氏奏國王李倬薨，請冊封世子溟襲爵，此表仍是李倬首敍，先於順治二年十一月，暨本年二月，云云，是順治三年三月以後，至六年



六月以前所上也。

順治六年蔡應桂揭帖一件云巡按山西監察御史爲恭報復城捷功事，略謂山西平遙太谷二縣前曾失城，本年五月內，端重親王督兵晉祠鎮，殺賊大勝，平太僞官聞風逃竄，城已恢復，倏而奸民內順賊衆復返，九月十四日，和碩親王打破汾州府，乘勝長驅，平遙賊首劉三元逃躲，太谷縣死賊，猶行抗拒，我兵於十月初四日，用紅衣大礮將太谷打開，殺賊無數，此皆仰仗皇父攝政王洪福所致，云云，順治六年十月日，朱色油印，漢篆曰，巡按山西監察御史印，按端重親王名博洛，太祖孫，饒餘敏郡王阿巴泰第三子，順治六年，命爲定西大將軍，討汾州叛賊，八月與征西大將軍禮親王滿達海，合兵攻汾州，九月克其城，斬僞巡撫姜建勳，僞布政使劉炳業，疏中先言端重親





王者，王一人也。後言和碩親王則併禮王而二，以和碩概之，不復分別矣。順治六年，劉武元揭帖一件云：欽差巡撫南贛汀韶惠潮郴桂等處地方提督軍務、都察院右都御史兼兵部左侍郎劉武元爲恭謝天恩事，略謂順治六年四月二十三日，奉皇父攝政王旨，劉武元加陞都察院右都御史兼兵部左侍郎職銜，張鳳儀依擬加陞，都著照舊管事。欽此。欽遵。聞命自天，感激無地。職受恩隆重，不敢套辭，惟有感激思奮，竭力撐持，圖報我皇父攝政王之高厚洪恩於萬一。云云。順治六年十月日，油印，縱三寸二分，廣一寸九分。漢篆曰：巡撫南贛汀韶等處提督軍務關防。按東華蔣錄，順治八年二月己亥，宣示睿親王多爾袞罪狀曰：獨擅威權，不令鄭親王預政，以親弟豫郡王爲輔政叔王，背誓肆行，自稱皇父攝政王，凡批票本章，概用皇父攝政王之



旨不用皇上之旨，此揭首尾無一皇上字，當時朝政可以想見。劉武元遼東人，明遊擊，天聰五年來降，隸鑲紅旗漢軍，順治三年任南贛巡撫，十一年卒，諡明靖。

順治七年馬鳴珮揭帖一件云，總督江南各省糧儲，兼理錢法，戶部右侍郎，馬鳴珮爲奏繳江寧屯衛錢糧完欠事云云。順治七年二月日，長方油印，漢篆曰，總督江南各省糧儲兼理錢法關防，鳴珮爲死難廣西巡撫文毅公雄鎮父。

順治七年攝政王哀詔一張云，奉天承運，皇帝詔曰，昔太宗文皇帝升遐之時，諸王羣臣擁戴皇父攝政王，我皇父攝政王堅持推讓，扶立朕躬，又平定中原，混一天下，至德豐功，千古無兩，不幸於順治七年十二月初九日戌時，



以疾上賓，朕心摧痛，率土銜哀，中外喪儀，合依帝禮，應行事宜，開列於後，一在京文武官員以成服之日爲始，孝服二十七日而除，一在京聽選官及舉監生員等，帽摘紅纓，腰繫白布帶，二十七日而除，民間帽摘紅纓，腰繫白布帶，十三日而除，僧道腰繫白布帶，十三日而除，一自聞喪日爲始，在京禁屠宰十三日，一藩王及在外文武官員，以詔到之日爲始，帽摘紅纓，跪聽宣讀訖，舉哀，行三跪九叩頭禮，置白布滿袍，白布腰帶，就本衙門朝下有擡寫闕若干字夕哭臨三日，以成服之日爲始，二十七日而除，民間帽摘紅纓，腰繫白下闕五字而除，一闕

一字京在外音樂嫁娶，官員停百日，民間停一月，於戲，恩義兼隆，莫報如天之德，榮哀備至，式符溥海之心，布告多方，咸宜知悉，順治七年十二月二十日，

朱色水印，方五寸，漢篆曰，皇帝之寶，滿字曰，汗呢句寶貝句按



此詔載之東華蔣錄，乃是年十二月己亥所頒，己亥即二十日，惟不著應行事宜。又東華王錄，順治七年十二月戊子，攝政睿親王多爾袞薨於喀喇城，年三十九，丙申柩車至，上迎於東直門五里外，由東直門至玉河橋，四品以下官，俱於道傍跪哭，戊子爲十二月初九日，丙申是十七日。

順治七年夏，玉揭帖一件云：欽差巡撫山東等處地方，督理營田，提督軍務，兵部左侍郎，兼都察院右副都御史，夏玉爲欽奉恩詔事，略謂東昌府恩縣人南錫逼弟婦褚氏改嫁，嗔伯南應禎等，並褚自美不允，刺傷應禎之面，復斃自美妻翟氏之命等情。順治七年九月二十五日，三法司題，奉皇父攝政王旨，於十一月初六日辰時，將南錫斬決，云云。順治七年十二月日，關防如式，按刑人於市，而用欽奉恩詔字樣，義不可解。疏中額記庫，本音額哲庫，漢



名今之主事。

順治八年詔底一本，一世祖章皇帝親政詔，一孝端文皇后祔廟詔，一追尊攝政王爲成宗義皇帝詔，一崇上聖母徽號詔，一罷攝政王廟享詔，殘闕不完，錄之如下。

世祖章皇帝親政詔，奉天承運，皇帝詔曰，朕得以沖齡即位，削平寇亂，垂衣端拱，統一多方，皆皇父攝政王之功也。朕今躬親大政，總理萬幾，深思天地祖宗付託甚重，海內臣庶，望治方殷，自惟涼德，夙夜祗懼，天下至大，政務至繁，非朕躬所能獨理，分猷宣力，內賴諸王貝勒大臣，內三院六部，以下闕卿寺等衙門，外賴諸藩王貝勒等，以下闕撫司道府州縣衛所等衙門，提督，以下闕一應滿漢內外文武大小官員，皆下闕務各殫忠盡職，潔己愛人，任怨任下闕利。



弊必以上聞，朝廷恩意，期於下究。下闕七字平治，凡我民人，宜仰體朕心，務本興行，樂業安生，共闕一字泰寧之慶，合行恩赦事宜，條列於後：一在京諸王以下，至六品官員以上，俱加恩賜；一在外諸王以下，至公等以上，俱加恩賜；一內外滿漢官員，一品封贈三代，二品三品封贈二代，七品以上封贈一代，八九品止封本身，已載前詔，其前詔後陞補官員，遇此詔者，照見任官品，亦如前詔封贈，該部作速舉行。一官吏兵民人等有犯，除謀反叛逆，子孫謀殺祖父母、父母、內亂、妻妾殺夫、告夫、奴婢殺家長、殺一家非死罪三人、採生、折割人、謀殺、故殺真正人命、蠱毒、魘魘、毒藥殺人、強盜、妖言、十惡等，真正死罪不赦，隱匿、滿人照例治罪外，其餘自順治八年正月十二日昧爽以前，已發覺未發覺，已結正未結正，咸赦除之，有以赦前事相告訐者，以其罪罪之。一凡文武官



員，見在議革議降，及住俸戴罪，併勅督撫提問究擬者，盡與豁免，一各省萬  
歷年間加派地畝錢糧八年，一年准免三分之一，一畿輔地方原未派有萬  
歷年間加增地畝錢糧，其下闕三州縣派徵等則不一，八年一年上三則免下闕  
字三分之一，下三則全免，一五嶽四瀆等祀，應遣官致祭者，照舊下闕若一文  
官在京四品以上，在外三品以上，武官下闕若各送一子入監讀書，一國子監  
監生，免坐監一箇月，已撥歷者下闕若一順治八年鄉試中式舉人，大省加十  
五名，中省加十名，小省下闕名，九年會試中進士四百名，一各省直儒學恩貢  
一名，以正貢作恩貢，次貢作歲貢，一有負固不服，潛據山海者，如能率衆來  
歸，悉赦已往，仍量功陞賞，一有因叛逆干連原係無辜者，該督撫審明即爲  
具題釋放，一附進賊巢居民，原未從賊，有司將領一槩混捕擅殺者，該督撫



察實參處，一各處盜賊，或爲饑寒所累，或爲貪官所迫，實有可憫，如能改過就撫者，准赦其罪，一奸民訛詐，動以謀叛通賊告害良民，此後如有越境妄告者，該督撫即行嚴拏究審，情虛反坐，以安良善，一凡貪官罪應至死，與不應至死者，俱免罪革職，永不叙用，賊仍照追，一凡應追贓私，察果家產盡絕，力不能完者，槩與豁免，毋得株連親族，於戲政在養民，敢虛天地生成之德，時當親政，恒念祖宗愛育之心，詔諭臣民，咸宜知悉，順治八年正月日，按東華蔣錄，順治八年正月庚申，上親政，御太和殿，大赦天下，庚申是正月十二日。

李端文皇后祔廟詔，奉天承運，皇帝詔曰，內則光前，行克兼於慈孝，鴻名裕後，禮莫大於尊親，稽古追崇，昭茲播告，欽惟我皇妣皇后，承乾正位，體順居



貞光輔太宗，式擴開成之烈，佑翼沖子，宏昭啓迪。

下闕若  
于字

遺訓如存，追思罔極。

仰迓徽音之嗣，琬琰生光，允宜顯號之隆，苾芬同薦，恪遵成憲，丕

下闕若  
于字

天地

宗廟社稷，率諸王貝勒，文武羣臣，恭奉冊寶，上尊諡曰：孝端正敬仁懿莊敏  
輔天協聖文皇后，於順治八年正月十九日升祔太廟，於戲，至哉坤元，永表  
配天之德，渙斯大號，式孚率土之心，布告天下，咸使聞知，順治八年正月日  
謹按孝端文皇后，博爾濟吉特氏，科爾沁和碩福親王莽古思女。

追尊攝政王帝號，詔奉天承運，皇帝詔曰：有至德斯，享鴻名，成大功，宜膺昭  
報，皇父攝政王，當朕躬嗣服之始，謙讓彌光，迨王師滅賊之時，勳猷茂著，闢  
輿圖爲一統，攝大政者七年，偉烈居以小心，厚澤流於奕世，未隆尊號，深歎  
朕懷，謹於順治七年十二月二十五日，祇告天地宗廟社稷，追尊爲懋德修



道廣業定功安民立政誠敬義皇帝，廟號成宗，併追尊義皇帝元妃爲敬孝  
忠恭靜簡慈惠助德佐道義皇后，同下闕廟享，既舉盛儀，應覃恩赦，合行事宜  
條列於後，於戲聲名洋溢，昭令德以如存，禋祀優崇，質羣情而允協，布告天  
下，咸使聞知，順治八年正月日，條款與世祖親民詔同，而少殺，從略不錄，按  
東華蔣錄，順治七年十二月甲辰，追尊攝政王爲義皇帝，廟號成宗，八年正  
月，祔廟禮成，詔赦天下，王先謙東華錄削去未書。

崇上聖母徵號詔，奉天承運，皇帝詔曰，帝王統御寰區，撫綏億兆，莫不正名  
彰德，致隆於所生，乃仁孝之至情，尊養之彝憲也，欽惟我聖母，翼贊皇考，勤  
修內則，克諧宮壺，以御於家邦，誕育眇躬，劬勞啓迪，纘承鴻緒，混一多方，揆  
厥本原，下闕慈庇，王公臣庶，咸謂宜崇上尊號，兼晉徽稱，以孚中外之心，協古



今之禮，察茲公議

下闕若  
干字

天地宗廟社稷，於順治八年二月初十日，率諸王

下闕  
若干

字奉冊寶上尊號曰，昭聖慈壽皇太后，隆儀備舉，愷澤覃敷，所有恩恤事宜，條列於後：一和碩親王以下，宗室三等愛惜喇喇章京以上，應厚加恩賜；一外藩諸王以下，固山額真，精奇尼哈番以上，各加恩賜；一內外自公主以下，至革革各加恩賜；一滿洲及在內蒙古舊烏金綽哈公爵以下，拖沙喇哈番以上，併襲職幼官隨朝以上者，各陞一級；內有從前以來行閒著勞已久，及在署供職有年，各官應破格分別陞授；一先經頒給誥命各官，今遇恩詔陞授者，於誥命內准撰世襲罔替，舊烏金綽哈阿達哈哈番，滿洲拜塔喇布勒哈番，今遇恩詔亦准撰給誥命；茲詔以後，已領誥命者，如再膺實職，不載入誥命之內，另行撰給勅書，白身任梅勒章京，白身任甲喇章京，滿洲蒙古白



身任牛彖章京、滿洲蒙古烏金綽哈、白身任侍郎、白身下二字粘院學下闕若任尼

哈啓心郎、白身任副理、白身任下闕若一級、一在京文官五品以上、各加一級、

一在京官員九品以上、厚加恩賜、一各省鎮總督巡撫並總兵官各加恩賜、

一地方人材果有誠實有德、山林隱逸、下闕若具奏酌與錄用、一各省人丁徭

銀徵派不等、八年一年曾分九則者、上三則免七分之一、中三則免五分之

一、下三則免三分之一、不入等則者、三錢以上免半、三錢以下全免、畿輔除

前詔免過外、再照各省一例蠲免、一各處滿漢兵丁分馬步戰守、各加賞賚、

一歷代帝王陵寢、先師孔子闕里、應遣官致祭、照舊例舉行、一滿漢孝子順

孫義夫節婦、該管官細加諮訪、確具事實、勘結奏聞禮部、禮部核實以憑旌

表、一自順治元年起、至八年二月十一日昧爽以前、凡衛所充軍人犯、不論



永遠終身，悉與赦免回籍，督撫仍將赦下闕若冊報部，一營中倒斃馬匹，有按

年責賠之例，自順治八年二月下闕若未賠者，悉爲豁免，一各營兵丁征戰勞

苦，如月餉有欠者，該督撫速爲補給，一徵調別省兵丁，深爲可憫，其家口坐

糧，照例給發下闕實惠，一朝鮮歲額進貢各色綿紬五百下闕若紬一百疋，棉布

六百疋，於戲立愛惟親孝思下闕若聖母丕隆名壽於萬斯年下闕若各祇乃身

裕乃心勤乃下闕若天庥以共臻於邳理，布告天下下闕順治八年二月十一日，

謹按昭聖慈壽皇太后，即孝莊文皇后，姓博爾濟吉特氏，科爾沁和碩忠親

王宰桑女，愛惜喇喇章京，今作固倫德愛惜喇喇章京，即輔國將軍，固山額

眞，定名都統精奇尼哈番，定名子爵，革革諸王以下女，今改格格，烏金綽哈

定名漢軍，拖沙喇哈番，即圖瓦沙喇哈番，定名雲騎尉，阿達哈哈番，定名輕



車都尉，拜塔喇布勒哈番，定名騎都尉，梅勒章京，即梅楞章京，定名副都統，甲喇章京，即札蘭章京，定名參領，牛彖章京，定名佐領，尼哈啓心郎，即漢啓心郎，副理，即愛惜喇庫哈番。

罷攝政王廟享詔，奉天承運皇帝詔曰：鄭親王，巽親王，端重親王，敬謹親王，同侍下闕。合詞奏言：太宗文皇帝賓天時，諸王貝勒大臣等，同心堅持舍下闕扶

立皇上，彼時臣等，並無欲立攝政王之議，惟伊弟豫下闕勸進，彼時皇上尙在

幼沖，曾將朝政付伊，與下闕威權不令鄭親王預政，遂以親下闕誓肆行，自稱爲

皇父攝政王，下闕皇上之功，盡爲己功，又將太宗文皇帝素日恩養，諸王大臣

下闕皇上捐軀竭力，攻城破敵，剿滅賊寇之功，下闕朝廷全爲己功，其儀仗音樂，

侍衛之下闕皇上同，蓋造府第，亦與皇上宮殿無異，府庫之財，任意糜費，下闕珍



寶不與皇上，伊擅自用，又將皇上侍臣宜而登，陳泰一族及所屬牛下闕達七  
一族，盡收入自己旗下，又親到皇宮院內，以太宗文皇帝之位，原係奪立，以  
挾制皇上侍臣，又吹毛求疵，逼死肅親王，遂納其妃，下闕口財產等項既與皇  
上，旋復收回，以自厚其力，又欲皇上侍臣厄而克歹青歸己，差吳拜勞下闕以  
侯爵，因歹青不從，復罷侯封，又差下闕皇上侍臣什諾卜庫云，我疼你，你可下闕  
批票本章，不用皇上之旨，概用皇父攝政王旨，下闕太廟凡伊喜悅之人，不應  
官者濫陞，下闕自行追封，又不令諸王貝勒貝子下闕皇上竟以朝廷自居，令其  
日候下闕吳拜，速拜，勞什，鉢羅會口稱，下闕重親王，敬謹親王，暨侍衛下闕鉢羅會  
正法額克沁，吳拜，下闕顯有篡位之心，臣等俱畏威下闕皇上不知，謹冒死奏聞，  
今以伊功下闕太廟這本內一應乖謬之事，皆臣等下闕伏願皇上重加處治，罷



伊母子廟享，下闕會議，衆口僉同，反覆詳思，諸下闕伊之近侍蘇沙哈，占代，木几  
勒首，下闕服藏匿御用珠寶，曾向何洛會，吳拜，速下闕會商議，欲背皇上，帶伊兩  
固山，移住永平府，又首下闕主肅親王子罵云，該殺的鬼種等，下闕王大臣詳細  
審問，逐件皆實，故將何洛會正下闕蹟看來，謀篡之事果真，謹告天地宗廟社  
稷，將伊母子並妻罷追封，撤廟享，停其恩赦，下闕天下咸使聞知，順治八年二  
月二十二日，此詔蔣王二氏東華錄俱載，蔣略王詳，字句亦互有出入，蓋彼  
皆討論修飾之筆，此則草創之作也，鄭親王濟爾哈朗，和碩親王謚莊舒爾  
哈齊第六子，巽親王滿達海，和碩禮親王謚烈代善第七子，端重親王博洛，  
多羅饒餘郡王謚敏阿巴泰第三子，敬謹親王尼堪，多羅廣略貝勒褚英第  
三子，宜而登今改伊爾登，厄而克歹青今改額爾克戴青，什諾卜庫今改席



訥布庫、速拜、今改蘇拜、勞什、今改羅什、鉢羅會、今改博爾惠、額克沁、今改額克親、蘇沙哈、今改蘇克薩哈、占代、今改詹岱、木几勒、今改穆濟倫、

順治八年張大治揭帖一件云、鎮守山東沂州等處地方總兵官、都督僉事、張大治爲慶賀事、恭遇皇上躬臨大政、詔頒遐邇、職誠歡誠、忭稽首頓首上言、伏以聖主當陽、統百王之制治、太阿獨握、肇萬國之咸寧、臣民欣慶、海宇歡騰、恭惟皇帝陛下睿哲天縱、文武性成、大政親臨、恩波洋溢於海甸、乾綱丕振、德澤被及於昆蟲、喜見太平有象、樂享國祚無疆、職夙荷豢養、謬膺職守、弗能躬趨以舞蹈、聊摠微悃以揚言、伏願皇上聖德日新、益懋緝熙之化、皇圖鞏固、恒登雍穆之天、職無任瞻天仰聖、激切歡忭之至、爲此除具奏外、理合具揭、須至揭者、右具揭帖、順治八年五月初九日揭、朱色油印、漢篆曰、



防勦山東沂州等處總兵官關防。

順治八年沈永忠揭帖一件云、欽命挂剿撫湖南將軍印、鎮守東南地方、駐  
筭湖廣寶慶府、續順公沈、爲恭謝隆恩事、切爵欽逢皇太后尊上徽號、二月  
初五日蒙恩錫緞子杭口口三疋、摩頂放踵、不足以報弘恩、云云、順治八年  
八月初八日、朱色水印、方三寸三分、漢篆曰剿撫湖南將軍之印、滿字曰、

  
按續順公沈志祥、遼東人、明副將、入本朝


隸漢軍正白旗、順治五年薨、無嗣、兄子永忠襲爵、此揭單銜不名、即永忠也、  
切即竊字、

順治八年閏印揭帖一件云、順天府府尹閏印等謹揭爲科舉事、照得順治  
八年八月初九日開科鄉試、十二日早、府尹恭捧第二場題目呈進、云云、順



治八年八月日具，朱色水印，方三寸，漢篆曰順天府印，滿字曰



印漢軍正黃旗人，護國寺東路南，成端甫少司馬章，其後人也，公子繼壽朋君昌，官夏曹時爲余言之。


順治九年都察院殘題本一件，僅存漢本，云都察院承政固山額真，臣阿拉善等謹題，爲會議酌定臺員事，略謂臣等昨會同吏部公議，國家財用匱乏，臣衙門中御史百員，暫減二十員，其八十員內，舊人三十員，新人五十員，俟差用不足時，再行題請，云云。順治九年四月初七日，都察院承政固山額真，臣阿拉善，太子太保左都御史臣房可壯，參政臣納都胡，臣佟國胤，左副都御史臣傅景星，左僉都御史臣李蔭祖，啓心郎臣課羅科，印篆如式，面版硃批，依議，該部知道，六字，滿本闕，按阿拉善後改阿喇善，爲余長房第三世祖。



太宗文皇帝時，授擺牙喇甲喇章京，即護軍參領。崇德二年，列黑白昂邦即議政大臣。八年，擢鑲黃旗滿洲梅楞章京，即副都統。順治元年正月，兼任刑部參政，即漢員之侍郎。七年，陞本部承政，即漢員之尙書，兼鑲黃旗蒙古固山額真，即都統。九年四月，兼任都察院承政，即漢員之左都御史。此本爲順治九年四月初七日所上。正公初兼都察院時也。房可壯，山東益都人。明萬曆三十五年進士。傅景星，河南登封人。明崇禎十年進士。俱詳貳臣傳。納都胡，後改納都瑚，佟國胤後因避廟諱改佟國印。並李蔭祖等，俱見滿洲名臣傳。

順治九年，兵部滿漢題本一件，漢文云：少保兼太子太保，兵部尙書，臣金之俊等謹題。爲捉獲密報賊犯事，略謂采育營守備柳汝梧據無名密帖報稱，



何道等殺死史禿子，即會同城守滿洲阿兒大把兔力，帶兵將何道等拏獲，到部提審何道等，並無殺人事情，即被殺史禿子之婦潘氏亦爲何道稱冤，柳汝梧相應革職，併滿洲阿兒大把兔力等，乞勅下刑部確審擬罪，云云，順治九年四月二十三日，少保兼太子太保兵部尙書臣金之俊，侍郎臣特金，臣阿克善，臣金維城，太子太保兼都察院右都御史管左侍郎事臣李化熙，右侍郎臣李元鼎，啓心郎臣科樂可岱，臣祝萬年，職方清吏司理事官臣哈達孫，臣馬成貞，臣吳天壽，副理事官臣唐幾祿，郎中臣卜兆麟，面版硃批漢文云，是柳汝梧著革了職，併阿兒大把兔力等，刑部審擬具奏，計二十二字，正中書一題字，並結銜年月，各鈐朱色水印，方三寸三分弱，漢篆曰，兵部之印，滿字曰， 超哈句 依句 珠噶罕句 呢句 多鑾，按把兔力，



清字硃批，並本中清字，皆作巴圖魯，人名用兔字，當時並不拘泥，巴圖魯公鼇拜之作把兔鹿公是也，文通以順治八年遷兵部尙書，晉少保兼太子太保，覺羅阿克善，滿洲正黃旗人，順治八年任兵部侍郎，金維城，漢軍正黃旗人，崇德七年任兵部參政，順治元年改稱侍郎，李化熙，山東長山人，明崇禎七年進士，仕至兵部右侍郎，總督三邊軍務，入本朝，至順治四年，以工部侍郎兼兵部侍郎，李元鼎，江西吉水人，明天啓二年進士，仕至光祿寺少卿，甲申三月從賊，授僞職，入本朝，至順治二年任兵部右侍郎，啓心郎，舌人也，原因諸王貝勒管理部務而設，後除宗人府外，各部院皆裁，今並宗人府亦無之，滿理事官，即伊七轄喇哈番，漢稱郎中，滿副理事官，即愛惜拉庫哈番，漢稱員外郎，後除宗人府外，各部院皆改從漢名。



順治九年湯斌翰苑館課一本，政貴知變論云：治天下者，不察古今之變，則一代之體不立也；治一國者，不察天下之變，則一國之體不立也。蓋時有遷革，治化因之；夏商之忠質，成周之文物，非三代聖人之意也；勢也。太公治齊，報政三月，伯禽治魯，報政三年，亦非二公之意也；勢也。蓋惟聖人善於因時，而俗儒狃於聞見，安石行周禮，而宋道衰；孔明用申韓，而蜀幾霸。夫周禮聖人之書也，申韓刑名之學也，或以之亂，或以之治，此非周禮之過，襲周禮者之過也，非申韓之功，用申韓者之功也。

此段頂批波瀾俱是古文六字墨書

趙廣漢之在潁川也，鉅筭

鉤鉅而奸豪息，韓延壽之治馮翊也，閉閣思過而良民輯，二者寬嚴異矣，而循良同聲，嘉績偕奏，卒不聞廣漢與酷吏同傳，而延壽與懦夫並稱，若此者何也？治水者，必相山陵度地脈而後加疏鑿焉；治民者，必視風俗察民情而



後加德威焉。此不可不知也。嘗讀唐史，至文宗見崔郾初治陝，不鞭一人，既遷鄂而嚴刑不貸，曰：治陝宜寬，治鄂宜嚴。政貴知變也。噫，何明達若斯也！吾獨怪崔郾能明陝鄂之形，而當時朝廷獨不明天下之勢也。蓋唐至文宗而弊極矣，藩鎮恣橫於外，手握乾符，宦豎肆虐於內，口含帝憲，而其初年元老未隕，良將猶在，倘能奮然自勵，慨然於貞觀開元之不績，取元和以後之政令，渙然變革，與民更始，天下治亂未可知也。此段頂批責備文宗別出一議論亦有見十二字夾批此段人似蘇蘇六字俱墨書而乃因仍弊習，顧以李訓鄭注之流，謂可藉以驅除奸豎，噫，何其愚也！當甘露變起，禍及罟罟，唐之不亡，其間不能容髮，蓋亦危矣。至燕居深宮，自比桓靈，撫座嘆息，泣下沾襟，何其憊也！使移崔郾治陝鄂之識，以治天下，必不沿穆敬之餘，而忘太宗之業，任近侍之臣，而疏股肱之彥，吾知士良之徒，可不勞而去也。



不知務此、陵夷至于武宣、雖欲振而不能矣、此則尙可爲也、而不知變、故曰、當更張而不更張、雖有大賢不能善治也、云云、白紙朱絲欄、每頁十八行、面頁書館課二字、旁註四月下旬、下書門生湯斌四字、同時所見尙有陳子達、王顥、方猶、余恂四本、論題皆同、後並綴以喜雨詩一首、公獨無詩、公字孔伯、號荊峴、晚號潛庵、河南睢州人、明天啓七年丁卯十月二十日巳時生、父祖契、字孝先、州學生、母趙氏、流寇陷州城、罵賊死、公以順治五年戊子舉於鄉、六年己丑科會試、中式第一百九十九名、九年壬辰殿試三甲一百六十七名、賜同進士出身、改庶吉士、授國史院檢討、十二年出授潼關道副使、十六年調江西嶺北道、尋以父老乞休、康熙十七年舉博學鴻儒、授翰林院侍講、二十年充日講起居注官、浙江鄉試正考官、轉侍讀、明年充明史總裁官、遷



左春坊左庶子，二十三年二月擢內閣學士，六月補授江寧巡撫，二十五年內用禮部尙書，管詹事府事，二十六年改工部尙書，是年十月卒，年六十一，雍正十年，入祀賢良祠，乾隆元年追諡文正，道光三年從祀孔子廟廷，著有洛學編、明史藁、湯子遺書、潛庵語錄、詩文諸集，見國史名臣傳，陸嘉穎湯斌傳藁、國朝先正事略、馬世英康熙睢州志、王枚光緒睢州志等書，此課爲文正在翰苑時所作，不著年分，考王廷燦輯湯潛庵先生年譜，順治九年壬辰，先生二十六歲，成進士，授宏文院庶吉士，是年應詔擬御製大清會典序，及送敬謹親王詩，作政貴知變論，順治十年癸巳，先生二十七歲，在館課，是年作歷代備荒考，諸儒問難論，是此課作於順治九年初入翰苑時也，原文四庫全書所收湯子遺書不載，嗣同治庚午，湯氏祠堂重刻高要蘇廷魁序刊




本始行錄入，考文正全集，經門人似齋王氏廷燦編輯，即四庫所收湯子遺書十卷是也，先是文正友人簣山田氏蘭芳，嘗評輯遺稿五卷，閩梅公中丞興邦又加評梓行，文正裔孫又補刻疏稿家書年譜，均未進呈，祠堂刻本一并采入，以補不備，此篇在第五卷，論門，下注館課二字，此卷爲文正親筆，以人格論洵爲希世之珍，至若用筆適潤，出入鍾王猶餘事也，王廷燦錢塘人，康熙時爲吳縣令。

順治九年平南王揭帖一件云，平南王揭爲塘報事，略謂順治九年九月二十七日，定南王旗左翼總兵官馬雄等，擊賊於勒村地方，去梧城不及二十里，除獲僞副將李定國、梁挺材，僞參將王文，僞監軍副使黃裳，僞都司陳鳳等，除將李定國等，審實梟示外，理合題報云云，順治九年十月初四日，紫色



水印，方三寸五分，漢篆曰平南王印，滿字曰，按是

役在克復梧州之後，李定國另是一人，非桂王所封安西王晉王之李定國也。智順王尙可喜，順治六年五月改封平南王見前。馬雄固原人，仕至廣西提督，康熙十三年叛附吳三桂，後病死。

順治九年江西知縣奏本一件云，江西等處承宣布政使司撫州府宜黃縣知縣臣王世詒謹奏，爲朝覲事，順治九年十月十五日，後銜同前，朱色水印，方二寸一分，漢篆曰，宜黃縣印，滿字曰，隨疏齋繳錢糧

冊一本，面版硃批，該部知道，冊併發，這本比式稍闊稍長，著飭行，十八字，按東華王錄，順治九年七月癸未，諭內三院題本奏本各有格式，先已勅禮部發式通行，近見內外本章，尙有長短寬窄，違式參差者，內院即傳諭禮部嚴



加申飭云云此本奏上適逢其會故批旨如是

補

又浙江知縣奏本一件云浙江等處承宣布政使司金華府義烏縣知縣臣張國檠謹奏爲朝覲事順治九年十月二十九日朱印漢篆曰義烏縣印滿字曰




面版硃批該部知道册併發這本無貼黃失填册數著

飭行十九字

補

順治十年都察院題本一件云少保兼太子太保都察院左都御史臣金之俊等謹題爲請旨酌差事略謂廣西巡按御史王荃可自九年七月至今杳無音信或仍照例註差或俟該省大定再行議差臣等未敢擅便謹密題請旨云云順治十年二月二十四日左都御史金之俊參政宜把漢納都胡佟國胤左副都御史范達禮傅景星左僉都御史李蔭祖啓心郎課羅科朱色



水印，方三寸三分，漢篆曰都察院印，滿文曰  面版  
硃批，廣西按差著暫停七字，按王荃可山東益都人，順治三年進士，授行人，  
洵陞湖廣道監察御史，巡按廣西，九年七月李定國陷桂林，定南王孔有德  
自縊，荃可被執不屈死，十年贈太僕寺少卿，賜祭葬，子松以廕入國子監讀  
書，後銜啓心郎課羅科，滿文作科爾坤，當時對音殆如此。

順治十年高桂滿漢文揭帖一件云，禮科愛惜喇庫哈方遼黨等都給事中  
降一級仍供原職高桂謹揭，爲文風所關最鉅，學臣濫取可駭，謹請旨處分，  
以勵儒効事，略謂昨閱湖廣學臣李承尹所解生員試卷，如邵陽縣一等三  
名朱思永，知及之，仁能守之，莊以蒞之，題中比有振采瑯瑯，揚美鏘鏘，人曰  
擷而藻也，不若敦而彝，厥旃旂旂，厥劍煌煌，人曰摹而華也，不若式而璧等



語、股尾有敢云佩珊珊德華燦也、而未敢云燦等語、寧鄉縣一等三名廖步  
鼇、有德此有人題、後比有山川雖渺、以性情爲英蕩、質文雖異、以志氣代璽  
旌等語、又職同官陳協、閱出辰溪縣一等一名劉任道、君子之於天下也、無  
適也、無莫也、義之與比題、起講有意氣生於有情、而有情者傷、意氣生於無  
情、而無情者敗等語、小比有然後知君子非他也、蓋於天下之人也、蓋非急  
急於天下之人也、而又非不急急於天下之人也等語、中比有古淡可與小  
民言情天下歌思之、黼黻可與一世靖亂天下歌思之等語、皆險僻怪誕、悖  
謬不通、伏祈將學臣照例處分、士子即行黜退、庶人心咸知儆惕、云云、愛惜  
喇庫哈方、佐貳官名、國初六科有之、漢譯或爲副理、後定爲在宗人府名副  
理事官、在六部名員外郎、



順治十年衍聖公揭帖一件云，孔子六十六代孫，少保兼太子太保，襲封衍聖公孔興燮謹揭，爲籲恩請卹以光泉壤事，略謂爵妻馮氏，於本年二月二十日病故，循例陳乞勅下禮部頒給一品祭葬，庶亡者得光泉壤云云，順治十年閏六月日，無印，按陳敬基至聖先師世系考，孔子六十六世，興燮字超呂，順治五年三月襲封衍聖公，七年加太子太傅，八年晉太子太師，此順治十年揭帖，署銜少保兼太子太保，世系考誤。

順治十年滿漢梵三合字勅諭西寧普法寺一件云，皇帝勅諭西寧地面大小官員軍民人等，朕維佛氏之興，其來已遠，西土之人，久事崇信，其教以無爲爲法，無漏爲因，化導善類，覺悟羣迷，有能尊崇其教，以啓迪一方之人，去其昏迷，嚮慕善道，強不凌弱，大不虐小，息爭鬪之風，無侵奪之患，上下各安，



共分長幼，各遂其生，同歸於仁壽之中，功德所及，豈不遠哉！今特頒勅西寧  
普法寺護持所在官員軍民人等，務要各起信心，尊崇其教，聽從妙善通慧  
國師丹進堅錯及本司刺麻僧人，自在修行，並不許侮慢欺凌，其常住一應  
寺宇田地山場園林財產孳畜之類，諸人不許侵占騷擾，庶俾佛教弘通，法  
門清謐，而一方之人，亦得以安生樂業，進修善道。若有不遵朕命，不敬三寶，  
故意生事，侮慢欺凌，以沮其教者，論之以法。故諭。順治十年九月二十二日，  
朱色水印，方三寸五分，漢篆曰救命之寶，滿字曰。


順治十年高士奇滿漢殘奏本一件云，山東濟南府長清縣民，臣高士奇高  
士林謹奏，爲賊殺五命慘冤，縣官枉法，反陷苦主，冒死叩闕，仰乞聖鑒，勅誅  
錮弊，嚴究奇冤事，略謂臣父馬宗哲，生臣弟兄六人，分析另住，臣父同母馬



氏及兩幼弟、兩幼妹，因應府書赴省居住，父瘋日久，母能生利，動賊垂涎，於去年十月二十七日夜，將母弟及妹一家五命盡行殺死，歷城知縣張弘祚，受賊賄囑，又將臣等冤填黑獄，冒死叩閤，伏乞准勅該督撫誅蠹剿貪，急救獄命。云云。順治十年十一月日，山東濟南府長清縣民臣高士奇等，面版書一奏字，硃批云：據奏賊殺五命，反陷苦主，其中必有緣故，情節真假，著該督撫嚴察確究，如事屬展脫，當從重議擬具奏。該部知道。按國初高士奇姓名者，江村而外，此又一人，平民奏本罕見之物也。

順治十年戶部題本一件云：戶部尚書臣車克等謹題，爲預發耕藉銀兩事。云云。順治十年十二月十四日，戶部尚書臣車克，削去官銜二級，仍供尚書原職。臣陳之遴，左侍郎臣畢里克兔，左侍郎臣孫廷銓，右侍郎臣范達禮，右



侍郎臣王弘祚、啓心郎臣祁徹白、啟心郎臣李迎春、啟心郎臣任治國、福建清吏司副理官臣杜爾把、福建清吏司署司事主事臣李宗孔、硃批、依議行、三字、朱色水印方三寸三分弱、漢篆曰戶部之印、滿文曰  貝官、尼、句珠、句罕、句尼、句多、鑾、陳之、透明、順天巡撫祖苞子、入本朝、至順治九年、任弘文院大學士、十年、因承審奸民李應試、緘默取容、調任戶部尚書、又因集議總兵任珍罪、支飾欺蒙、削官銜二級、仍供原職、畢里克兔、今改畢力克圖、姓博爾濟吉特氏、順治十年、由禮部左侍郎調任戶部、

順治十一年、戶科滿漢題本一件云、戶科愛惜喇庫哈方臣打哈他等謹題、爲欽奉上傳事、云云、順治十一年五月二十九日、戶科愛惜喇庫哈方臣打哈他、臣夸哈里、副理官臣徐必進、臣扈申忠、都給事中臣杜篤祐、左給事中



臣王廷諫、給事中臣周曾發、臣周體觀、他赤哈哈方臣布達里、番漢字筆帖式哈方臣丹泰、朱色水印、漢篆曰、戶科之印、面版硃批云、知道了、册留覽、該衙門知道、十一字、按他赤哈哈方今改他齊哈哈番、定漢名爲博士、番漢字筆帖式哈方今改稱筆帖式、與元代必閣赤同、番亦作翻、今改緡、

順治十一年曹際昌郭承胤領狀二件、其一云、宣府總鎮標下提塘守備曹

際昌、今於以下自第二行低三格寫與領狀事、依奉領到宣府葛峪路、署遊擊管參將事、郭承

胤敕書一道、當堂領交委官郝璜、中間不致冒領、所領是實、順治十一年六月日、標七月初二日、提塘守備曹際昌、住順城門外驛馬市菓子巷口內、丹色油印、縱二寸六分、廣一寸五分弱、漢字正書、宣府總鎮標下提塘守備曹際昌封、十四字、墨筆批標云、據本官印領准代領、初二、又本官郭承胤領狀



一件、語略同、末署順治十一年六月初六日、朱色油印、縱三寸、廣一寸八分

強、漢篆模糊、滿字云、



葛

句

峪

句

路

句

衣

句

參

句

將

句哈番

句尼

句多

變

墨

筆

批

標

云、

據

本

官

印

領、

又

提

塘

具

領

准

給、

初

二、

按

愈

樾、茶香室續鈔、引國朝程晚驚喜集云、功令領狀保結、皆有今於與三字、今

於字屬上、與字屬下、而另行空白、不得其解、有老吏曰、雍正朝、憲廟閱卷、嫌

其允贅、以硃筆抹之、因遵爲定式、抹處用空白、今於字止、與字起、則硃筆所

未抹者云、此國初領狀、今於與字、兩行便有空白、並不始於雍正時、程氏之

說誤、

順治十一年洪承疇密揭一件云、欽命經略湖廣江西廣西雲南貴州等處  
地方、總督軍務、兼理糧餉、太保兼太子太師、內翰林國史院大學士、兵部尙



書兼都察院右副都御史，洪承疇謹揭爲梧州賊情緊急，鎮兵單薄可慮，臣謹據報上聞，仰祈聖明鑒裁事。略謂李定國既犯高廉，旋回柳州，職已馳會兩廣督臣李率泰、廣西撫臣陳維新，檄行提督鎮臣線國安協力戰守。又時下逆賊飄忽，合無將靖南王先駐梧州，再移桂林。云云。順治十一年七月初二日，印篆見前，面版密揭二字，墨標順治十一年七月二十九日到。按李定國與孫可望、劉文秀等皆獻賊餘孽，定國受桂王由榔封西寧王。順治九年七月陷桂林，定南王孔有德殉難。十一月戰衡州，敬謹親王尼堪中伏陣歿。其攻陷高廉雷諸府，在順治十年。李率泰正藍旗漢軍人，總兵官永芳次子。仕至宏文院大學士，兵部尙書，兩廣總督，諡忠襄。線國安正紅旗漢軍人。順治九年擢廣西提督，十年加太子太保，十一年封三等伯，十二年給征蠻將



軍印，靖南王耿繼茂，順治八年襲父仲明爵，陳維新另見。

順治十二年陳維新揭帖一件云，欽差巡撫廣西等處地方，提督軍務，兼管糧餉鹽法，兵部右侍郎，兼都察院右僉都御史，陳維新，爲假兵詐害小民，恃惡淫掠良婦，謹據實奏聞，請旨從重處分事，略謂莫亞三以土宄充兵，指蘇玉啓兄爲賊官頭，意圖詐害，糾黨捉拏未獲，隨鎖其媳劉氏，淫辱拷索，又恨玉啓具告，持刀砍傷右脚，云云，順治十二年二月日，右僉都御史陳維新，朱色油印，縱三寸三分，廣二寸俱弱，漢篆曰，巡撫廣西等處地方關防，疏中云亞三於順治十年二月間，闖充王牛彖下營兵，字彙補，闖，隱入也，官牒多用此字，音未詳，此揭書法二王，墨色適潤，爲簿書中之僅見者。

順治十二年金之俊揭帖一件云，少保兼太子太保，實支正一品俸，內翰林



國史院大學士、金之俊謹揭、爲君恩洊加、臣心彌悚、瀝誠控辭、仰祈鑒允、以安分誼事、略謂本年四月初一日、捧接上諭、金之俊加少傅兼太子太傅、欽此、伏乞特允辭免、云云、順治十二年四月日、無印、按文通以順治十二年四月乙卯加少傅兼太子太傅、載之東華王錄、本傳失載、乙卯即初一日、

順治十二年滿漢文硃諭吏部一件、漢文云、諭吏部、中樞重任、宜慎簡畀、孫廷銓著陞兵部尙書、特諭、順治十二年十月二十三日、黃紙朱書、滿文不錄、按文定初名廷鉉、字道相、山東益都人、明崇禎十三年進士、任永平推官、本朝順治元年、起天津推官、歷吏部主事、郎中、太常寺少卿、左通政、戶部兵部侍郎、兵部戶部吏部尙書、加太子太保少保、擢秘書院大學士、康熙三年以疾歸里、十三年卒、諡文定、本朝孫氏諡文定者三人、一康熙時內秘書院大



學士廷銓、一乾隆時協辦大學士吏部尙書嘉淦、一咸豐時戶部尙書瑞珍、  
順治十二年滿漢祭神詞章檔一本、內順治十二年八月二十六日祭  
司工之神、十月初八日祭司工之神、十一月初二日祭門神、同日祭司工之  
神、順治十三年二月初三日祭顯佑通濟金龍四大王、同日祭延休顯應分  
水龍王、三月日祭司機之神、閏五月日祭江山社稷之神、同日祭乾清等宮  
司宮之神、同日祭交泰殿司殿之神、同日祭乾清坤寧等門司門之神、同日  
祭后土司工之神、七月日以初六日進居乾清新宮、祭告昊天上帝、同日祭  
告皇地祇、同日祭告太社太稷之神、同日祭告太祖武皇帝后、太宗文皇帝  
后、八月日錫封啟運山祭告肇祖原皇帝后、興祖直皇帝后、十二月初五日  
册立董氏爲皇貴妃、祭告太祖武皇帝后、太宗文皇帝后、文計十八篇、或祇



有滿文、或滿漢合璧，其中最有關係，足可攻破邪說者，厥惟祭告冊立董貴妃文一篇，照錄如下，其餘不錄。維順治十三年歲次丙申，十二月甲戌朔，越五日戊寅，孝孫嗣皇帝名御敢昭告於太祖承天廣運聖德神功肇紀立極仁孝武皇帝，孝慈昭憲純德貞順承天育聖武皇后，太宗應天興國弘德彰武寬溫仁聖睿孝文皇帝，孝端正敬仁懿莊敏輔天協聖文皇后，曰：茲於順治十三年十二月初六日，祇承慈命，冊立內大臣鄂碩之女董氏爲皇貴妃，伏惟聖鑒，謹告。云云。滿文董氏作 ᡩᠣᡵᡠᡳ 董鄂氏，篇末註云：交筆帖式哈番西爾泰亦滿文。按東華王錄，順治十三年十二月己卯冊內大臣鄂碩女董鄂氏爲皇貴妃，頒恩赦，十七年八月壬寅，皇貴妃董鄂氏薨，輟朝五日，甲辰諭禮部，皇貴妃董鄂氏於八月十九日薨逝，奉聖母皇太后諭旨，皇貴妃佐理



內政有年，淑德彰聞，宮闈式化，倏爾薨逝，予心深爲痛悼，宜追封爲皇后，以示褒崇，朕仰承慈諭，特用追封，加之諡號，諡曰孝獻莊和至德宣仁溫惠端敬皇后，云云。后姓董鄂氏，滿州正白旗人，內大臣三等伯，贈侯，諡剛毅，鄂碩女，撫遠大將軍安北將軍領侍衛內大臣，三等伯晉一等公，諡襄壯，費揚古與之爲兄弟行，董鄂亦作棟鄂，乃滿洲地名之一，董棟音同，當時以棟字不似姓，故書董鄂，又直省董鄂二字，而獨書董，以求與漢姓同，雖然此稿，國書仍是董鄂二字未改，大學士馮溥善果寺碑云，順治十七年爲董皇后設無遮會，駕臨旁皇周覽是也，吳偉業清涼山讚佛詩，王母携雙成，綠蓋雲中來，又可憐千里草，萎落無顏色，昔人謂暗指董后，語甚明顯，其讚佛一事，亦似即善果寺之無遮道場，乃浮囂者流，因偉業題董小宛像詩，有墓門深更阻



侯門之句，以爲后是冒辟疆姬人，被掠入宮，唱之和之，傳爲艷事，雖冒氏後人自辨其非，及近人作董小宛考，以年齒比較論駁，而時人猶負固不服，仍主先入之說，見此讀之，或可休矣，更有一證，某先達作本朝宮詞若干首，其一云，華風纖巧束雙纏，妙舞爭誇貼地蓮，何似珠宮垂厲禁，防微早在入關年，註順治初年，孝莊皇后諭，有以纏足女子入宮者斬，此旨舊懸神武門內，是則一切漢裝女子，皆不許入宮，匪僅董姬也。

順治十三年范祺投狀一件云，浙江紹興府會稽縣儒學增廣生員，范祺，今於以下另行  
低一格寫與投狀事，遵奉憲示考取二王字體，祺兼元人畫法，情愿投名聽考，伏乞恩准收錄，投供是實，順治十三年九月日，後面另粘住址一紙云，范祺係南胡老衲衲夾道王伯祥寓，此供書法二王，適潤可愛，當是本人手筆，南



胡老衲衲今無考，胡五音近，或即東南城之五老衲衲。

順治十三年宛平縣印結一張云，順天府宛平縣今於與結狀爲知會事，依奉結得宛邑官員俱不諳二王字樣，不致冒結，所結是實。順治十三年九月日，知縣于汝翼，朱色油印，方一寸二分，漢篆曰宛平縣印，滿字曰

子、子、子按順治中葉，考取二王書法，互見前范祺結。

順治十三年吏部文選司滿漢文手本一件，漢文云，吏部文選清吏司爲移會事，略謂國子監祭酒吳偉業，內翰林弘文院檢討白乃貞，丁憂遺缺，合用手本前去內三院典籍廳開送應補職名過部，以便會推云云。順治十三年十二月二十四日，理事巴哈塔，副理宜爾當阿，穆護理，驗封司郎中管文選司郎中事錢縱，主事黃鈺，朱色油印，漢篆曰，吏部文選清吏司印，按梅村先



生、前明榜眼、授職編修、尋充東宮講讀官、福王時、任少詹事、與馬阮不合、假歸、以兩江總督馬國柱、吏部侍郎孫承澤、及大學士馮銓等、累疏特薦、出仕本朝爲祕書侍講、稍遷國子祭酒、本年丁母憂歸、遂不復仕、至康熙十年病卒、考先生嗣母張太孺人、順治丙申年十月初十日卒、年七十六、宛平王文貞公崇簡、爲作墓誌銘、見青箱堂文集、丙申正是順治十三年、十月初十日、在具手本之日前、即此事也、

順治十四年洪承疇揭帖二件、一云、欽命經略湖廣江西廣西雲南貴州等處地方、總督軍務、兼理糧餉、太傅兼太子太師、內翰林國史院大學士、兵部尙書、兼都察院右副都御史、今解任調理、洪承疇謹揭、爲慶賀事、順治十五年正月初一日、恭遇元旦、職奉差在外、不獲同在廷諸臣躬親拜舞、謹望闕




叩頭慶賀，伏願皇上懋膺嘉祉，永享太平，職不勝踴躍懼忭之至。爲此除具奏外，理合具揭須至揭帖者。順治十四年十一月二十五日，貼黃不錄。一爲慶賀慈聖者，皇太后字三擡寫，餘同。文襄於順治十年經略湖廣廣東廣西雲南貴州五省，旋薦原任大學士李率泰爲兩廣總督，與平南王尙可喜、靖南王耿繼茂，駐守廣東，而以江西省改歸己轄，鑄經略湖廣江西廣西雲南貴州內院大學士印，見貳臣傳。

順治十五年田雄揭帖一件云，提督浙江等處地方總兵官，少傅兼太子太傅，左都督，一等景勤尼哈方，今住俸載罪。田雄爲責效殊恩方重，覲天夙願未伸，懇將微臣歸旗，並請臣弟入侍，以張敵愾，以展葵誠事。云云。順治十五年八月日，朱色油印，漢篆曰，提督浙江總兵官印。按貳臣傳，田雄宣化人，明



總兵，本朝順治二年，縛其主福王降我，令以原銜隨軍，尋授杭州總兵，累擢提督，加左都督銜，授爵一等子，加少傅兼太子太傅，晉三等侯，康熙二年卒，贈太傅，諡毅勇，從子象坤襲爵，乾隆十五年定侯號曰順義，傳稱順治十五年奏隸漢軍鑲黃旗籍，並請以弟豹代己入侍，即此事也，景勤尼哈方，本音爲精奇呢哈番，後定漢名爲子爵。











國家圖書館



002960434

